

摘藻堂四庫全書薈要

集部

欽定四庫全書薈要

集部

明詩綜卷四十一

詳校官編修

臣

王天祿



欽定四庫全書會要卷二萬五百十四

集部

明詩綜卷四十一

翰林院檢討朱彝尊編

舒

芬一首

芬字國裳進賢人正德丁丑賜進士第一授翰林修撰以諫南巡受杖謫福建鹽課司副提舉嘉靖初議大禮再杖歸卒有梓溪集

靜志居詩話舒公首犯逆鱗幾斃于杖其撰崇德李君墓志中書本末最詳謹抄撮于左始車

駕議以三月十九日壬子東巡祀岱宗歷徐揚
抵南京下蘄州復沂江浮漢登太和山人情洵
洵懼變將相大臣多慙患之十五日子率同館
先上疏兵部黃鞏伯固陸震時亨疏亦上為太
宰陸完所沮是夕夏良勝于中萬潮汝信過予
憤惋邀太常陳九川至署名明日吏部張衍慶
元承刑部陸偉天爵等疏亦入又明日禮部姜
龍應賓兵部孫鳳鳴和行人余廷瓚伯獻等俱
連疏入時又有太醫院醫士徐鏊以醫諫車駕
不果出矣癸丑上忽震怒下黃鞏陸震夏良勝
萬潮陳九川于錦衣衛獄以舒芬張衍慶姜龍
孫鳳陸偉等百有七人跪午門外五日而行人
司疏不報以通政司壅之也乙卯余廷瓚等俱
下獄丙辰同黃鞏等六人亦跪午門外五日梏
拳是日工部林大輅以乘等三人大理寺周子
厚等十人亦連疏入丙辰俱下之獄亦梏拳跪

五日時復有金吾衛指揮張英言車駕出必不利肉袒戰刃於脅以死諫天威遂不可霽戊午岑等一百有七人午門受杖四月己卯杖翠等六人發徐鑿邊遠充軍林大輅周叙余廷瓚俱受杖時死杖下者陸汝亨劉宗夏何孟循林質夫劉珏余伯獻孟子乾劉平甫李德卿詹敬之李崇德十有一人崇德諱紹賢盱眙人以行人齋孝貞純皇后遺詔至徐州開讀時羣閱勢熏炙率屬吏視州衛官偃然席班首君立詔左從容令去其席搗不得與職官同禮焉其文比之實錄所紀尤詳詩頗涉理學語五言如江花迎載酒沙鳥避歸航菊黃三逕冷巖翠一松存七言如水入柁撈流去響風吹魚網過來腥思家我亦愁千里為客誰能耐十年紅粉滿樓初入趙青山百里尚圍燕芳草有情生夜雨天桃如夢繞春山未如莊子舟藏壑欲買謝公墩結廬

高樹間雲輕護鶴小橋新水淺通魚芹香華屋
來玄鳥樹暗青山隱杜鵑誰為剪殘今夜韭獨
憐開盡故園花
皆焉然有致

東流遇雨

歲晏東流縣江雲黯寂寥雨滋帆葉重風急浪花飄鴻
鴈飛何遠蛟龍舞更驕客懷何處遣隔岸酒旗招

崔桐

一首

桐字來鳳海門人正德丁丑賜進士第三累官
南京禮部右侍郎有東洲集

玉虛山行

是處瑤宮敞，隨山羽客棲。
雲根百里路，木杪萬重梯。
人語鳴虛壑，鷄聲報隔谿。
桃源知不遠，欲往路仍迷。

夏言八首

言字公謹，貴溪人。正德丁丑進士，授行人，歷吏科都給事中，改翰林侍讀學士，累官少師、吏部尚書兼華蓋殿大學士。後棄市。追謚文愍，有桂

洲集

顧玄言云：相君優於詞，自成別調，頗多豔藻。穆敬甫云：夏公律法精嚴，間出逸趣。

李舒章云文懋詩頗長
應制第有形模而少氣色

詩話貴溪游覽贈酬之作不及分宜而應制
詩篇投頌合推不若素文崇之近於褻也

保定公館晝坐

重門掩長晝槐陰知午過瓦雀上階行青蟲抱絲墮公
暇亦憑几好風時入座終羨南村翁悠哉北牕卧

安鄉道中觀婦人插田

南村北村競栽禾新婦小姑兼阿婆青裙束腰白裹首
手擲新秧如擲梭打鼓不停歌不息似比男兒更膂力

自古男耕女專織憐爾一身勤兩役吁嗟乎長安多少
閨中人十指不動金滿身

無逸殿西壁詩應制

睿藻承遺訓農歌啓聖衷千秋所無逸七月詠幽風帝
學詩書在神謀制作同光昭文祖業原上有新宮

秋日同李序菴顧未齋張亭溪飲鄭氏莊

雨後沙全濕風前竹半斜野橋通細水秋圃映餘花出
郭悲塵鞅臨池憶釣槎清歌且終日應不問年華

夜泊吳江

月岸秋燈滅風湖夕浪翻
橋連楓葉冷城帶水雲昏
把燭延津吏停舟次驛門
漁歌起何處瀟灑數家村

漢川道中

晚市浮烟歛春洲曲水連
遙燈林表亂圓月浪中偏
犬吠經村店蛙鳴逼稻田
夜行三十里野興得蕭然

次薛西原

背郭茅齋僻沿堤竹徑斜
杖藜逢野客酌酒共山家
暖

日熏芳草寒流漾淺沙江村二三月歲歲足鶯花

象麓草堂初成和杜

水碧沙明洲渚迴籬深竹靜草堂開風吹山木蕭蕭下
日落江帆片片來有客相過時載酒主人無事日登臺
愁看直北關山迴白草黃雲秋正哀

王邦瑞一首

邦瑞字惟賢宜陽人正德丁丑進士改庶吉士
累官兵部尚書贈太子少保謚襄毅有集

伏羌道中

曉發天水郡西行見城堡茅屋十餘家周垣亦百堵門
前挂弓箭牆上施樓櫓居處雜牛羊街衢寒糝土危峰
列戍臺疾騎飛傳羽一夕烽火至居人自比伍我從漢
中來悠悠思徃古此地戎馬區從來多荼苦漢有隗囂
據唐為吐蕃部宋人扼金遼歲歲苦侵侮干戈如鼎沸
生靈飼豺虎皇天眷明德聖作乾坤覩窮塞入版圖混
一歸神武向來蹂踐場禾黍皆膻膻承平思預防綢繆

在牖戶勿使邊防弛寇入臨洮府

蔡經

五首

經字廷彝侯官人後復姓張正德丁丑進士累
官南京兵部尚書總督浙直軍務改左都御史
為趙文華所劾逮至京論死追謚襄愍有半洲
集

詩話襄愍死非其罪郡志寃之國史白之無識
之徒以為東南之論殊不然傳聞異辭不可不
覈以余所聞趙文華病篤命禱其平生所陷六
人襄愍其一則文華已心悔其誣且與楊忠愍

同日死於市公論亦可定矣
其詩特清婉無拔劍橫槊氣

同漳源侍御遊華不注峰并泛大明湖

平生慕幽曠雅懷避煩躋林園苟成趣亦足供逍遙況
茲出東郭雲物如相招羣山秀嫵娜一峰特岩嶢開筵
坐琳宇浩歌凌紫霄朋情藉軒豁客思翻飄飄睠言泛
蓮沼復爾移蘭橈窈窕遵玄浦逶迤渡七橋菰蒲水清
淺石竹風蕭條槐陰宿鳥下藻動潛鱗跳何緣對淑景
且幸聯高標因探歷城勝并采康衢謠

中山早行

客夢長不成，鷄聲起偏早。
既無夜寐安寧，似晨興好。
銀河澹欲沉，朱炎寂猶埽。
搖旆指秦關，駕車歷周道。
古塔振風鈴，高槐護芳草。
對此忘驅馳，以舒懷抱。

己丑陪祀南郊

歲序南郊重，齋居北闕虔。
金輿下霄漢，寶篆裊雲烟。
肅穆千官靜，歡呼萬姓傳。
天風引仙樂，清切最堪憐。

驚湖道中

鷺湖山下春可憐野梅含雨柳生烟遊絲細細駐林杪
浴鷺悠悠飛水田物候催人如過客朔雲回首忽經年
征衣尚拂紅塵路悵望鄉關落照邊

蘭河曉渡

月落金城鼓角殘危關曉色拂雕鞍黃河渺渺中原隔
紫塞迢迢邊地寒西望旌旗連瀚海東來風雪滿皋蘭
萍踪萬里休惆悵虎節龍沙亦壯觀

張岳

三首

岳字維喬惠安人正德丁丑進士除行人疏諫
南巡受杖調南國子學正入為武選員外歷祠
祭郎中出為廣西提學僉事調江西謫廣東鹽
課提舉遷知廉州府轉浙江提學副使歷參政
以僉都御史撫治鄖陽改江西尋以右副都御
史總督兩廣軍務召入為刑部侍郎掌都察院
事復出總督楚蜀卒贈太子少保謚襄惠有小

山類稿

詩話襄惠初釋褐與林希元陳琛談理學時目
為泉州三狂始以言禮忤永嘉繼忤貴溪分宜
幸以功名終文治武功所至登績詩其餘技然
如宛宛西飛日餘光照我裳江空流月華白石
光凌亂理深物有悟興極感相因幽篴迷舊蹊
田磴距飛轍微風萬里陰落日半江烟非熟精
文選理者
不能作也

留客亭

憑軒有所思所思在遠岑我有青絲瑟欲奏無知音
萋萋芳草色遲遲美人心佳期不可敦離憂故難任
冥迷風雨交歎息河梁深歸來卧山中浪浪涕霑襟
願乘空

谷駒翩翩夕巖陰桂枝聊攀折芳馨日相尋山阿華歲
晏莫受霜霰侵

同翁夢山游三海巖

夙愛山水遊茲山屢延賞披雲入青冥巖屋呀弘敞玲
瓏開北戶峭壁排銀榜初駭溜石懸漸喜瓊芽長幽泉
時一滴毛骨森蕭爽壺觴屢獻酬清言激靈響天末多
風波陳迹成俯仰徒聞海上洲中宵勤夢想聊茲永日
留真性非外獎暝色望征途何由釋塵鞅

與夢山登欽州東城樓

登高易為感況茲萬里心
高城餘百雉翠色前山深
詰屈水通海蒼茫日載陰
美人隔宵旦末由攬芳襟
舉手招青鳥願託瑤華音
青鳥不我顧瑤華日以沉
耿耿還自念有酒且共斟

許宗魯 二十二首

宗魯字伯誠一字東侯咸寧人正德丁丑進士
改庶吉士授監察御史厯湖廣按察僉事副使

太僕少卿大理少卿以僉都御史撫保定以副

都御史撫遼東有少華陵下遼海歸田等集

王元

美云許伯誠如賈胡子作狎游隨事揮散無論
中節 蔣仲舒云中丞五七言位置勻穩首尾
妥潔氣格粗備可當作手使更推思入玄取材
進古得不溫溫其言哉 黃清甫云許詩字句
嚴飭篇章方整得古人之格白溝之作弔古慨
今辭意俱盡志士讀之求見深衷定當擊節可
謂無慙前作其近體雖多直語亦有爽氣曩
秉鉞兩方戎事倥偬不廢文翰彌見其高
詩話少華諸體皆工寓和婉於悲壯之中譬
之秦箏獨無西氣足與邊廷實王子衡並驅

渡白溝

昔運邁屯厄恒紀變參商南風日不競朔吹亦遠揚英
雄各乘御龍戰血玄黃矯矯平將軍獨立當中央張弧
射九日撫劒盼四方事去迹故隳志伸願已償竭來歲
月久道里未能忘仲生固為忽死亦其常停驂覽故
壘雪涕履戰場清川帶滌紆白骨浩縱橫惋歎不能發
總轡歌此章

贈楊伯雨

昔與君為別乃在黃金臺高歌易水曲落日悲風來今

與君相逢乃在廣陵郡朔雪滿江湖冉冉歲華盡與君
肯紅顏雙鬢忽已素日月如逝川東流焉得住酌酒勸
君飲援琴為君歌起望長江雲澹澹垂綠波丈夫有心
期結交共終始南山青桂枝豈為歲寒死

己酉元日作

檢歷年華改看雲歲色新地天開泰日星斗建寅春去
國身何遠趨朝夢轉頻江湖與廊廟憂樂竟誰人

三月三日

上巳今朝是風光異往時海雲成雪易塞柳得春遲目
極關山道情懸曲水詩誰能修禊遠一洗望鄉思

遼左雪中登樓

歲杪崇朝雪天涯絕塞城凍雲連海色枯木助風聲懷
土情無已登樓賦未成梅花南國思笛裏暮愁生

東岳

秩祀嚴東土明禋冠五宗金函神鬼錄玉簡帝王封海
湧中宵日巖留上古松何時凌嶽竊飛舉跨蒼龍

登岳陽樓

澤水含秋盛樓光向晚孤倚闌聞白鴈把酒對蒼梧楚
客悲今昔湘靈怨有無興來留賞地落日下平湖

零陵西亭同朱大參袞楊僉憲材賦

入洞探幽蹟登臺散遠心雷聲帶雨重虹影射江深地
接三苗國天垂八桂林來游陪二妙詞賦總南金

自清溪泛舟出江與柯元卿話別

清溪澹無色客子放歸舟浦暗黃花雨江行白露秋故

人惜遠別尊酒話中流漸近銅陵縣青山動我愁

送馮子言還吳

夢寐東吳好相違幾歲華憐君理歸櫂秋色滿天涯醉
詠江樓月晴看海寺霞春來如憶我須寄早梅花

自毘陵如姑蘇

仙舟搖極浦驛路指吳門海氣春冬雜風潮日月昏鴈
回書不到家遠夢空繁總是江南好何如歸故園

晚渡黃河

落日西山暗，洪河夏漲餘。
昏黃沉鞏洛，浩渺極梁徐。
鼓聽臨流驛，燈看遠岸漁。
頻年在行役，倚櫂一長吁。

西苑

畫閣橫青漢，雕臺俯碧流。
苑雲低度雨，宮樹早生秋。
水抱芙蓉殿，山連翡翠樓。
何須浮海外，即此見瀛洲。

徐氏南莊秋集

九月重逢閏一年，秋未殘城南。
時載酒樓上，復憑闌黃菊霜前。
放青山雨外，看病軀猶自可不畏倚高寒。

立秋日曲江別業作

垂柳晝陰陰
村居門巷深
秋光來此日
時序感吾心
水鳥浮沉浴
風蟬斷續吟
江臯餘暑在
竹下且披襟

邊事

先皇神武竝周宣
北伐親兵駐萬全
飲馬幾思臨瀚海
銘功何止勒燕然
龍沙夜靜妖星落
虎帳秋高漢月懸
分閫登壇諸將老
至尊宵旰獨憂邊

石首昭烈廟

永安宮裏龍髯斷石首山頭寢廟孤
三峽風烟沉王氣
千年營壘識雄圖時移玉殿丹青古
雪暗滄江鴈驚呼
噓燼可憐延漢祚遺靈猶見禱荆巫

醫閭春望同李戶部

醫閭登眺倚雄邊遼左封疆指顧全
山勢北來連靺鞨
海雲東盡辨朝鮮巖花競暖霏香雪
塞草留春藹翠烟
公暇暫同淹永日喜無烽火報甘泉

登齊山樓

近郭危樓俯碧湍，倦游孤客倚層闌。
淮淝山色尊前出，吳楚江流畫裏看。
旅思逢秋增短髻，鄉心隨鴈過長安。
黃花白酒登高日，玉笛金笳起暮寒。

班婕妤

妾命由來薄，君恩豈異同。
自憐團扇冷，不敢怨秋風。

春興

野霽花爭發，川長柳漸齊。
春光更何許，多在杜陵西。

城南游覽

楊柳今無渚芙蓉舊有園
請看蒿里地即是樂游原

戴鰲 四首

鰲字時重鄞人正德丁丑進士除刑部主事歷

官右副都御史巡撫四川有東石遺豪

李景堂云中丞

擅經世才負氣高亢居官四十餘年關節不至其門權貴俱心憚之竟坐此三起三黜不得盡

其用論者惜焉其詩

老健蒼涼是一作手

感興 三首

高梧有良質斲為雙綺琴
疏絃映金徽泠泠發佳音一

彈薰風至更彈江月沉大雅久以寂志士寄幽吟坐令
衆喧息洞見太古心

蘭蕙種不長荆棘日以滋青青野中蔓引身百尺枝春
風一吹拂垂垂得其宜夭桃開上苑苦李道旁遺賦命
固如此物情胡不怡托根各有所聊用以自持

離離庭樹花風日正妍好翻翻辭枝葉忽已及秋杪君
子心百年小人計昏曉請君平生志慎勿事溫飽

宣風公館作家書後用壁間陽明先生韻

雲外微紅見燒痕道邊寒水入溪渾此時日落楚山館
後夜月明何處村已近閉關猶道路偶逢傳札念晨昏
獨燒官燭看妻子卧聽郵吏驚夢魂

胡侍

四首

侍字承之咸寧人正德丁丑進士除刑部主事
進員外陞鴻臚寺少卿坐議大禮謫潞州同知
尋下詔獄論為民尋命復職有濛谿集

王元美云胡承

之如病措大習白猿公
術操舞如度擊刺未堪

詩話承之詩原北地而五言頗近信陽弇洲稱
之云雖於風雅未縣合往往時材骨格殊亦不
失實

宴王御史惟人山亭

別館秋城側高亭夕霧中疎簾通野色曲磴裊天風
醉舞招松鶴悲吟和草蟲平生習池興遮莫笑山翁

九日同陳魯南文徵仲劉希隱薛君采登海印寺
鏡光閣

湖景澄珠閣雲虹度石梁行攀雙樹杪坐對九華觴
水

抱香城入山橫紫禁長憑高不厭晚待月詠胡牀

送劉德徵守夔府

國有蠶叢古城聞白帝雄龍蛇夏禹廟雲雨楚王宮羽
檄通南徼樓船進北風還令蜀父老喜得漢文翁

涼州詞

落日黃河水倒流沙場旌旆風悠悠新降胡兒不解語
笛中吹出古涼州

陳文沛 一首

文沛字維德長樂人正德丁丑進士除工部主
事歷郎中出知撫州府調蘇州遷霸州兵備副
使以陝西行太僕寺卿罷歸有世槐堂豪

懷遠堡和韻

峭壁樓危石徒杠漫遠沙河流隨溜曲樹影逐風斜客
枕移更鼓鄉愁起暮暮官齋何寂寞鄰舍兩三家

吳仲

一首

仲字亞甫武進人正德丁丑進士歷官南京太

僕寺少卿有鴻爪集

送吳舍人使中州

茅土分封重天書十道開浮槎乘月渡飛舄倚天迴南
國王孫草西園驛使梅荆溪何處是遙在白雲隈

汪佃 二首

佃字友之弋陽人正德丁丑進士改庶吉士有
東麓集

苑口別意圖為弋陽李生題

秋來苑口漲初生
美爾歸帆一片輕
折柳離亭休弄笛
客邊禁得斷腸聲

雨行

落花飛絮踏成泥
煙雨廉纖日向西
行客正愁行不得
鷓鴣偏傍馬前啼

林希元

一首

希元字思獻晉江人
正德丁丑進士官至大理
寺丞有次厓集

丁酉除夕有感

牢落天涯兩歲除，夢中曾幾賦歸與。
聖朝未有寬恩詔，邊郡猶勞判事書。
忙裏不知殘臘去，客邊惟覺二毛疎。
椒盤此夜誰觴酒，忽憶家鄉萬里餘。

李士允

一首

士允字子中，祥符人。正德丁丑進士，歷官陝西參政。兼苑馬寺卿，有《山藏集》。

晚過劉中丞園

暝色延春徑烟光啓夜關綠深裴相墅香滿白公山銀
燭回花底金壺待竹間不妨山簡馬乘醉月中還

王漸逵

一首

漸逵字用儀番禺人正德丁丑進士授刑部主
事建言不報乞歸隆慶初追贈光祿少卿有青

蘿集

洪舜臣云青蘿詩文如騏驎在御雖鳴
鑾節奏而若滅若沒之氣終不可掩

詩話青蘿詩無定格遣興即題鐵橋
一絕直追踪唐許碣閬苑花前之作

鐵橋

狂客山中不費招瑤池春宴夜聞簫醉餘不記歸時路
曾跨青羊過鐵橋

曹嘉一首

嘉字仲禮扶溝人正德丁丑進士改庶吉士授
御史以言事出補大名府推官尋復官御史又
以言事下獄謫禹城知縣降茂州判官仍復原
職升山西提學副使終江西右布政使有漫山

集

王元美云曹仲禮如公孫大孃弟子
舞劍頗見淋漓見其師者不覺愴然

詩話王元美撰卮言謂獻吉晚為其甥曹嘉所
厄良苦而鄉黨之論不然朱秉器游宦餘談述
汴人語謂仲禮終身父事獻吉勿衰梓行舅氏
集選吳下以善書名者繕寫獻吉兄孟和有姊
即仲禮母素與獻吉有隙恒不相見一日兄姊
欲過獻吉獻吉喜劇盛供饌以俟比入門獻吉
出迓方揖孟和即陪獻吉于階兄姊交毆之時
仲禮在都聞之惶懼不寧者旬日專人以書慰
獻吉是厄其舅者非仲禮矣仲禮好賓客所與
游最密者詩則謝茂秦書則徐子仁奕則閻子
明嘗語茂秦云吾舅氏稱詩家練字不如練句
練句不如練意練意不如練格蓋墨守舅說若
是以此知卮言亦
有不足深信者

次韻荅空同舅氏

兩度微官謫孤身絕塞行
漢廷收墮淚蜀道軫離情
玉壘蠶叢國龍標劍閣城
乾坤形勝地何處挂冠纓

王廷陳

三十五首

廷陳字稚欽黃岡人正德丁丑進士改庶吉士授吏科給事中諫南巡杖謫裕州知州尋下獄

免歸有夢澤集

皇甫子循云稚欽樂府古詩齊軌潘陸下擬陰何五律並肩沈

杜

俞汝成云夢澤詩清切不凡榮潤可愛

王元美云王稚欽如良馬走坂美女舞竿五言

尤是長城

穆敬甫云稚欽如阮嗣宗日坐步

兵厨醉態百出而自無寒酸語顧玄言云王

給事調高趣新頗多奇句如深谷綿蠻冷然幽響殆與高岑方軌蔣春甫云雅欽五言漸近

自然頗多佳境陳卧子云雅欽爽俊故意警而調圓李舒章云雅欽操筆不煩軒然鵠舉

宋轅文云雅欽才情麗逸儻加以沈思當不減徐昌穀

詩話雅欽逸藻波騰雕文霞蔚音高秋竹色豔春蘭樂府古詩既多精詣五言近體亦是長城固已邈後凌前足稱才子

擬矯志篇

蛟龍雖困不資凡魚

一作鯢

鷺鷥雖孤不匹鷺雛雖有香

草當戶必除雖有仁人在敵必誅狐白雖美炎暑必置

舟車之用易地則棄蕙蘭不采無異蓬蒿千將不試世
比鉛刀以驥捕鼠曾不如狸餓夫獲璧不如得糜郭生
純臣魯連高士彼乃登臺此則蹈海寧直見伐無為曲
全寧渴而死不飲盜泉

放歌行

竊鈎者誅竊國者王仁義資亂道豈不臧

一解

代秦者呂

襲楚者黃巍巍國君大道在傍

二解

謂尺何短謂寸則長

此不可度彼何可量

三解

獸殪罟裂鳥盡弓藏智勇既殫

軀乃見殃

解四

讒巧為忠直夫稱狂出門異趨毀譽曷常

解五

樂不可極憂來無方游心沖虛以保壽康

解六

妄薄命

春風轉蕙披蘭高臺曲榭中連經堂入奧張筵秦箏趙
瑟俱前鳴絃度曲雙妍輕舉紈袖僊僊宛若游龍翔鸞
翠盤金爵闌干呈能角技為歡種種厭射更端眼看陽
景西馳高張蘭燭承暉車倦馬怠不辭但歌不醉無歸
夜深坐促尊移含悰寫意向誰衆中色授君知願言竝

帶雙棲惡聞易別輕離佇立不勝徬徨獨宿寤言難忘
何以報君明璫起視銀河爛光牛女咫尺相望終夜不
成報章

陳卧子云詞本
子建聲情極合

行路難

北風蕭蕭雨雪滂辭我親友之朔方中閨少婦走徬徨
勸君斗酒牽衣裳道路縱橫多虎狼歲暮天寒百草黃
結髮本期不下堂君獨何為慕他鄉東流之水不西歸
宛轉蛾眉能幾時人生富貴亦有命辛苦馳奔空爾為

子夜春歌

初華錦繡舒千林望如一懷春廢機杼縑素難成匹

子夜秋歌

貪看秋月光夜久不成寢四顧寂無人玉階有雙影

對酒歌

二首

惠施已不作莊生寡所宣伯牙失鍾期抱琴誰為彈知
人誠不易知己良獨難周公輔王室管蔡乃流言骨肉
且不諒他人固宜然

人性稟靜躁物則準方圓錐刀各有能情好各自妍陰
霽難竝祈恩怨豈兩全於此雖不容於彼獲所安人無
億萬身何能徧周旋兼濟聖不贍榮枯有自然富而如
可求尼父願執鞭

詠懷 四首

兩儀立樞要萬事具紀綱智士運機權一童驅百羊羽
重金或輕尺短寸有長壯夫苟失據反為豎子傷獨綱
引六鼇纖繳連雙鶴操持貴不謬得失詎有常始悟制

人術豈在多與強

擊鼓以求亡疾馳以逃影驅介以乘高驂蹇以求騁揮
刃喪其柄振衣失其領趨舍昧良圖存亡在俄頃

姬旦制冠裳萬古承其賁偶以衣狙獠奔騰裂且棄承
雲本妙音鱗羽爭辟易魯門鐘鼓聲轉使爰居悸物類
何繽紛人已非一致遑哉尼父言盍各言爾志

昔聞有游女逍遙翔碧潯交甫下請佩解贈情亦深可
遇不可持變化愁予心影滅佩亦失漢廣無由尋眄睇

絕髣髴徘徊逮夕陰青鳥忽來過貽我金石音憂思耿
難忘寫意於鳴琴自傷非儔類感激長悲吟

雜興

偏才互短長名家殊去取連城償燕石千金享敝帚不
識東家聖翻謂西施醜定價豈目前知己俟身後

閨情

種木期息陰結交期得心與君初婚時安坐調瑟琴繫
我大秦珠貽我玳瑁簪攜手同車遊徘徊步春林俯拾

竝帶花仰聽和鳴禽折芳交贈持言誓一何深寧期被
讒妒棄我忽如沉曠歲不一接塵埃生錦衾明月入空
帷中夜坐悲吟發篋理故物淚下誰能禁

別張子言

我友駕言邁去去之朔方晨起促中厨為我具酒漿長
別在須臾且願盡杯觴昔為骨肉親比翼雲中翔今當
永乖違邈若參與商出門異鄉縣居世如朝霜世途轉
傾側良會安可常羸馬感人情哀鳴衢路傍悲風振喬

林岵岵摧中腸執手不能辭淚下霑衣裳恨無凌風翰
送子還故鄉

別曹仲禮

四首

與君一為別晷度逝不停奄忽二十載親串日以零短
者已物化存者非壯齡況復異鄉縣散處如晨星但言
長相思豈意今合併顏鬢各已改不易惟茲情孤鴻號
朔風黃鳥聲嚶嚶飛鳥戀儔匹況乃稱友生

別子大河側見子長江濱對面但疑歎含意慘莫陳豈

無新知歡念此同袍人攀留不須臾羲陽忽以淪奮身
思繫日天路邈無因安能附高翮一舉摩青旻飽者豈
念饑貴者羞賤貧薄終古所尤交誼貴在伸故心苟不
移何必會合頻慷慨即長路無為兒女仁

中夜起相送白露塗我襟低頭惜分手舉頭傷辰參斗
酒良不薄對之不能斟唧唧草間蟲助我揚悲吟為君
拭綠綺彈作清商音物理關人情淚下不可禁谷風刺
小怨孔公贊同心延陵輕寶劍高義垂至今親交信不

薄先民良可欽

泠泠山下澗童童山上松
粼粼澗中石瑟瑟松上風
波逝石不俱颺奔松莫從
物理相倚藉動息難可同
與君游宛雒矯若雙飛龍
中道悵相失末路欣此逢
旣逢不須更去復當嚴冬
霜霰集衡輓虎豹啼林叢
子其慎桑榆勞謙以令終

駕幸南海子

南郊初禮帝上苑復誇胡
虎兕先聲伏車徒翼輦趨
網

羅張一面部曲用三驅侍從羣臣在應知諫獵無

江上言懷

二首

野闊風雲入天迴楚蜀通渚禽多白鷺巖樹半青楓哀
怨湘君曲平成夏后功晚來懷古意極目送冥鴻

平野蒼烟合高城白鳥過澤蘭懷楚客石竹隱湘娥谷
響歸樵唱江鳴發櫂歌夕陽葭茨外將奈暮愁何

楚眺

眺迴臨高閣三湘萬里餘草邊雲夢獵花下武陵漁白

日山川氣清秋水竹居仙蹤同霸業消歇總愁予

李沔陽自大梁經裕州因贈

雪夜梁王宴霜秋宋玉愁
回瞻嵩嶽峙去逐楚江流
少室三花樹滄浪一葉舟
南行正搖落知爾憶林丘

張子魚過訪

故人天上至清宴夜深開
澤畔微芳度江皋暝色迴
楓林停翠幙月岸擁金壘
正苦歡娛逼無令候吏催

生日有感簡同館漢東少泉二子

五十年來是行藏往日非因之念親舊存者亦幾希孤
矢心猶壯文章力已微操觚從二子衰薄謝餘暉

宴魏子園亭

池館名江國賓朋實楚材屏間烟霧濕鏡裏芰荷開
以吹笙下魚因鼓瑟來邀一作盡歡須秉燭歌妓莫頻催

病中得顏子書并見示諸作

卧病當寒景空齋正爾思五禽終日戲雙鯉遠方貽久
著潛夫論初傳幼婦碑君才猶不用如我復何悲

春日山居 二首

野曠林爭出花深徑屢迴春風芳草外亂水白雲隈燕
接飛蟲去鶯沾落絮來小堂宜竹護一一荷鉏栽

草動三江色林占萬壑情籬邊春水至簷際暖雲生溪
犬迎船吠鄰鷄上樹鳴鹿門何必去此地可躬耕

山莊雜興 二首

老夫諳稼穡次第葺園廬對酒惟田父呼門絕里胥桑
麻經雨後花竹宛秦餘如此生涯足何勞薦子虛

事去心逾壯年來迹轉孤
濯纓臨漢沔安枕荷黃虞
春澗偏魚鳥秋牕近竹梧
出逢鄰叟飲醉倩野童扶

聞箏

花月可憐春房攏映玉人思
絲纖指亂愁劇翠蛾顰授
色歌頻變留賓態轉新曲終
仍自叙家世本西秦

病後答友人

一畝居連郢客鄉三年愁隔漢川長
青山各有幽棲志
白雪遙傳寡和章
自倚雲霞開藥圃
不將塵土灑荷裳

洞庭雪後烟波闊花底乘舟到草堂

燕京元夕曲

香車一一渡星橋翠袖雙雙引玉簫但訝遊人爭辟易
不知夫婿漢嫖姚

江暉四首

暉字景孚仁和人正德丁丑進士改庶吉士諫
南巡杖闕下出為廣德州知州召授編修進修
撰升河南按察僉事有曹爰子集

陳卧子云景孚好怪合者

亦六朝之遺

詩話景孚穿文鑿句辭必自鑄其文有令繼閎
怡理訓闡詰範詔已邛臬揆原命稽彝九篇誦
之若神經怪牒蓋倣姓紀公而作王稚欽贈以
詩云江生突兀揚文風千奇萬怪難與窮博物
豈惟精爾雅識字何止過揚雄古心已出丘索
上遂旨或與神明通求深索隱不肯置一言忌
使流俗同令弟大篆逼鐘鼎絕藝恥作斯邕等
生也為文遣弟書一出皆稱二難竝縱有楚史
不可讀滿堂觀者徒張目少年往往致譏評生
也不言但捫腹讀未終篇覺殷仲堪之眸子裴
叔則之頰毛傳寫畢露矣景孚詩稍
文從字順然豈可與稚欽竝稱邪

別劉子謙

天運無停機變化一何速四時更迭謝寒暑互徃復雷
霆促晝陰霜霰棲寒谷萬卉隨隙光安能久蕃育傷彼
蕙蘭花凋零竝蕭欵芳猶竟同岑賦命焉可卜

前上陵德勝門

先皇巡狩日此地即行宮拜舞千官肅飛揚八駿雄雕
弓開塞霧鼙鼓振山風今日繅華歇重過恨不窮

謁康陵

五柞淹珠葆千杉閤玉襦靈山鍾自肅虛殿珮仍趨雪

暗蛟龍蟄雲寒燕雀呼塵沙迷列岫何處訊蒼梧

感聞

南極雲山阻中天具錦盈如何去與住俱似弇中行迂
拙甘衰病飄零寄友生秋風蓬戶底蕭瑟旅魂驚

馬汝驥

三首

汝驥字仲房綏德州人正德丁丑進士改庶吉
士諫南巡罰跪闕下五日受杖出知澤州召還
為編修歷修撰國子司業南京右通政南京國

子祭酒升禮部右侍郎兼侍讀學士卒贈尚書

謚文簡有西玄集

王元美云馬仲房如程衛尉屯西營斥堠精嚴甲仗雄整

而士乏樂用之氣

顧玄言云侍郎優於律取

法初唐尤多華整但少情性耳

黃清甫云仲

房詩整練似法顏謝隊伍森然且關中之產氣

自不薄雖求之聲律未造其深亦不失高流也

蔣仲舒云仲房詩

有沈理而無玄趣

詩話仲房派沿北地由其體鈍存渾寂

而舍神明雖與租欽齊稱去而千里

酬明卿見遲之作

違時寡朋侶在世有羈縛雖抱投沙懷中欽臨海作美

人惠前顧軒車戒雙駱探幽肆廣筵握炙行高爵宴晤
稽故懽告別附新諾沁渚旣縣竿樓峰復聯絡捫蘿情
易暢攀桂興欲躍嚴程豈迂遠郵館祇淹泊復往瑤華
篇報桃恥涼薄吁嗟山水音非子諒誰託寄言儲醇醕
俟我乎偕樂

藏舟浦

鳳殿臨瑤水龍舟鑠白雲樓臺疑上漢簫鼓憶橫汾地
豈昆明鑿波猶太液分昔年浮萬里蘭桂詠繽紛

芭蕉園

路轉山樓直園開水殿低
碧荷春檻出紅藥晚階齊
釣石蛟龍隱歌臺鳥雀啼
翠華當日幸一道綠天迷

劉士奇

一首

士奇字邦正廣州順德

一云龍門

人正德丁丑進士

除刑部主事諫大禮杖闕下遷郎中出知梧州
府歷山東右布政使

秋夜旅懷

為客方如晉還家復入秦音書徒屬望燈火自相親草
色連朝改砧聲向晚頻那堪千里外猶有未歸人

王謳二首

謳字舜夫白水人正德丁丑進士除工部主事

遷刑部員外出為按察僉事有彭衙集

王子衡云舜夫

如敗鐵網取珊瑚用力堅深得實自少

康德

涵云舜夫才情之妙近日罕觀典麗咸備機軸

不九蓋作者之雋也

蔣仲舒云舜夫頗饒氣

格兼多沉思惜其純駁相半如披沙揀金治璞

取玉珠

勞匠手

詩話舜夫詩多至千六百篇譬田甫田種豆成
其若苗有莠當屬關中下農夜行一篇其汙萊
之嘉穀乎

夜行

夜行如在旦殘月清林光雲氣集深澗露華生早涼白
沙鬱浩浩翠壁凝蒼蒼寂歷松柏徑經過花草香鷄聲
互村落曙色動柴桑即事況多感離心含永傷

送姚方伯

野日流沙白山城落木黃秋來長送別何處折垂楊

汪應軫一首

應軫字子宿紹興山陰人正德丁丑進士改庶吉士諫南巡廷杖出知泗州嘉靖初召復館職授給事中出為江西按察僉事有青湖文集

仁葉

甫云先生以沉鬱澹雅之思出以溫厚和平之詞譬之太羹味之正也

詩話青湖知泗州康陵南巡中使傳旨俾進美人善歌吹者奏言泗州僻左婦女不諳歌吹惟民間醜婦能蠶儻納之宮中受蠶事庶於治化有裨遂寢事雖迂而實可傳也及卒鄉人私謚曰清憲先生蓋司諫為直臣牧民為廉吏講學為醇儒皆第一流也其論學詩云語道豈捐陸

扶世當從朱黯然思聖功二家皆真儒
審擇於鵝鹿之間非偏黨陽明可知

登浮峰寺

攝衣入空山白雲留我住我欲卧白雲白雲又飛去

王鳳靈

三首

鳳靈字應時莆田人正德丁丑進士歷官參政
有筆峰存豪

次梁學泉吏部徐州舟中夜酌之作

石灰江逾勁峰迴日易斜歸鴻迷極浦飛鷺落平沙越

客同杯酒春光正柳花相看仍意氣行路莫深嗟

送林遷于得告還山

祖席初分酒半醅相看無奈故人何生憎柳色臨岐路
況聽春聲入櫂歌舊國雲山何處是他年風雨憶君多
祇緣簪組能相絆未得相從訪薜蘿

次韻贈送鄧文溪刺維摩

青瑣黃門記昔遊諫書常出殿西頭須知九死當年事
豈分孤身萬里投瘴雨蠻烟仍壯節海雲江月重離憂

最憐號泣攀轅意誰為中原赤子謀

吳鼎一首

鼎字維新錢塘人正德丁丑進士歷官廣西布政司參議有泉亭集

讀史有感

漢武雄才世莫倫輪臺一詔見天真滿朝都入平津閣
猶有淮陽卧病人

陳良謨一首

良謨字中夫安吉人正德丁丑進士除工部主事歷官貴州參政有天目山房豪

詩話中夫生十月而孤母都夫人躬教之學既第奉母入京邸水涸卧小舟中夜呻吟母責之曰貧生出入徒步若初入官便思安逸縱此一念吾立見汝敗矣中夫泣伏罪歷任以清介聞歸田後入峴山社年已九十賦詩云
夙駕侵寒露歸帆拂暮星興復不淺

三窮辭為周侍御作

菰塘霜冷高烟平孤鴈失偶中夜鳴深閨發婦心獨驚
蘭膏無燄爆有聲盈盈淚落如斷縻妾心有苦誰則知

上有舅姑下有子與爾同生不同死

陸金一首

金字德如吳江人正德丁丑進士授工部主事
歷官江西按察副使

宿京口驛

風帆如馬過維揚滿目烟花路渺茫江上潮痕收暮雨
渡頭人影立斜陽十年季子裘應敝三月王孫草正芳
今夜月明京口驛計程應喜近家鄉

許相卿四首

相卿字伯台海寧人正德丁丑進士官兵科給

事中補禮科致仕有雲村集

董實甫云先生詩悲壯沉著格調高

遠

詩話雲村澹於宦情居紫雲山四十年風花雪
瀑游屐遍於巖椒而不一入城市其卒也聞人
嘉言輒以詩云平生城市無雙屐何物榮衰到
兩眉蓋實錄也詩取適意集出其手刪自序謂
棄其脫遺不可讀者存其餘可讀者自題絕句
云雲村病老語多哢造次詩成雜宋腔還溯開
元論風格拾遺壇上樹旌幢由今誦之諸體亦
自清潤不全雜以宋腔也若老如舊歷渾無用

病戀殘燈亦暫明
此則宋腔之佳者

古意

新月生西嶺明河低遠林坐見大火中秋序忽見侵感
歎老將至徘徊勞我心勞心復誰語聊撫東廂琴調高
曲未竟寡和難為音矯首文江子何時宣此襟

諸弟夜集

獻歲閏霖潦今夕欣澄和況我遠行歸兄弟會匪他晏
晏言笑洽楚楚壺尊羅東風舉衣袖明月在庭柯一觴

再三詠舞影時婆娑荏苒百年內白日如投梭載懷秉
燭游不樂如夜何

晚晴

苦雨連旬日初晴一振衣殘雲依海嶠新水到柴扉僻
性嫌山淺塵緣與世違斜陽疎樹裏清影石邊歸

霽色

霽色林廬晚愁吟野水灣斷雲虹外雨殘日鳥邊山海
宇堪流涕朝班祇強顏獨嗟身世拙早見髣髴毛斑

楊士雲

五首

士雲字從龍雲南太和人正德丁丑進士改庶吉士授工科給事中歷戶科左給事中有弘山

集

詩話給事未老抽簪自號九龍真逸坐卧小樓訂尚書蔡傳之得失撰黑水集證自春秋以來迄於元季歷代人物各詠以詩又取天文歷象律呂及皇極經世書地志皆分題成詠可謂好學也已其詩原出白沙定山近取裁於楊用修同時吳懋以給事及王廷表胡庭祿張含李元陽唐錡為楊門六學士六人皆滇產也

四望謠

望蓬萊駕蒼龍棗如瓜獻木公

望崑崙驂白虎觴九霞進王母

讀尚書

二十八篇今自漢伏生授二十五篇古至晉梅賾奏二十八宿外二十五宿又仲尼不可作誰復百篇舊

八月十五夜月

今夜中秋月當圓尚未圓人皆瞻白兔我欲問青天把

酒須來夕高歌似去年盈虛誰握算擬測子雲玄

春事龍關作

春事今過二月中登山載酒喜相同三點兩點社公雨
十番五番花信風子規啼血欲半夜蝴蝶掠香時一叢
醉餘白石高歌調日落水流西復東

曹弘二首

弘字毅之江陰人正德丁丑進士除知南豐縣
入為監察御史西川清軍以病還里有方湖集

御史馬子筆朱必東李明德陳良會主事林汝恒
俱以言事忤旨罷職謫官於其行詩以送之

海樹連雲暗燕花帶雨飛啼鶯三月暮逐客五人歸聖
代昭臣直危言犯主威賜環應有日留却舊朝衣

下夷陵

溪花丰茸溪雨涼雲水不分前路長山鳥一聲山竹裂
思君半夜發瀟湘

朱豹

三首

豹字子文上海人正德丁丑進士知奉化餘姚
二縣擢監察御史出知福州府有朱福州集

送顧經歷之福建

京華倦羈旅憂思喜南天烟柳山頭驛春溪樹杪船官
清蓮幕靜地暖荔支鮮況值干戈少詩篇紀歲年

秋日遣懷

雲物蕭條僧舍荒砌封蒼蘚半迴廊坐來草樹俱搖落
望入關山更渺茫憂國淚邊秋色老思家夢裏雨聲長

臨風却羨天涯鴈去啄江南晚稻香

寄程以道

隴梅隄柳又春風客子光陰似轉蓬此日天涯千里隔
昔年花底一尊同西川蹤迹孤雲外南浦離愁細雨中
早晚瞿塘新水發雙魚煩爾下巴東

素淮一首

淮字伯昭任丘人正德丁丑進士歷官知府有
汾淮泗西征諸集

秋夜宿堠馬驛寄舍弟渙

月騎傳沙浦風林出驛樓青燈萬里客玉露九霄秋失
路添星鬢還家滯驛舟未成春草夢徒有越鄉愁

廖世昭 一首

世昭字師賢懷安人正德丁丑進士除知海州
改國子博士卒于官有越坡橐

定光塔登高

寶塔層層上危欄面面開秋城圍野曲遠水接天迴日

射珠光迴風迎鐸響哀長安知萬里目斷朔雲堆

郭波一首

波字澄卿閩縣人正德丁丑進士戶部主事有
巖存橐

宿坪塘鋪

獨樹郵亭影千山征路塵東鄉今夜月偏照未歸人

明詩綜卷四十一

總校官庶吉士臣張能照

校對官檢討臣盧應

膳錄監生臣韓騰

欽定四庫全書薈要

集部

明詩綜卷四十二

詳校官編修臣王天祿



欽定四庫全書薈要卷二萬五百十五

集部

明詩綜卷四十二

翰林院檢討朱彝尊編

 錢

五首

錢字舉之鄞人正德辛巳賜進士第二授編修
出為湖廣按察僉事轉江西督糧參議山東提
學副使有少石子集

靜志居詩話崑山陸鼎儀鄞縣陸舉之其名同
賜進士第二人同一從史館出為太常一從史

館出為外臺適相合也鼎儀盛有詩名詩却平
平舉之不以詩名而詩似勝於鼎儀其督學山
東也見山東舊無通志而曰周公孔子百世之
師也六經斯文之祖也泰山五岳之宗也此一
方文獻而天下古今之事備焉志奚可廢也
乃編輯成書河山十二得公數言而增色矣

建昌道中

赤阪揚塵霾朱甍轉炎熾下有修竹林清泉陰涼翠行
子苦鬱蒸居者自幽憩豈為躁靜分亦緣身世異東門
瓜已稀南山豆堪藝回車理故岑願言遂高致

愛峰篇

愛山愛孤峯峯高不可即
誅茅卧其旁憑軒看空碧
裊裊金芙蓉海霞蕩日夕
下有蛟龍盤波濤起淵宅
浮雲倏蔽虧白日慘無色
蔽虧良有時我情終不易
請看石上蘿綢繆自今昔

妙高臺

石徑入迂迴高臺出林杪
遠岫迎歸雲層巒礙飛鳥
厓崩樹交撐壇靜花不埽
凌風一振衣清曠絕塵抱
仰接烟霞重俯視樓觀小
安得鞭蒼蚪翛然下蓬島

錢唐懷古

黃屋南遷日蒼山結鳳樓可憐江海地曾是帝王州鐘
梵傳宮樹笙歌恣客遊寒潮自來往難雪古今愁

謁文山祠

丞相名高宇宙垂螺江合有報恩祠運移諸葛身殲日
義盡睢陽力竭時戎馬中原空下淚松林異代尚南枝
彌天碧草傷春色楚賦招魂有所思

張孚敬

一首

孚敬初名璉字秉用永嘉人正德辛巳進士上
疏言大禮除南京刑部主事再上疏超擢翰林
學士陞禮部尚書兼文淵閣大學士歷少師兼
太子太師吏部尚書華蓋殿大學士贈太師諡
文忠有寶綸樓和御製詩蘿峰集

詩話蘿峰不由史館起家特授學士又以議禮
為持名教者所輕以是嫉詞林特甚尤惡詩人
文人八才子無得免者
比諸夏嚴更覺深刻

恭和御製翊學詩

聽講大學
衍義作

帝王治有道修身宜所先於皇聖天縱受命真自天陋
彼霸功小愛此王道平經筵講大學治法三代前乾乾
自不息安安而能遷升堂入其室登山陟其顛擴之保
四海泉達火始然卓哉真德秀義能衍斯篇微臣忝進
講膺服同拳拳

張治 三首

治字文邦茶陵人正德辛巳進士改庶吉士授
編修以左贊善使交南進學士陞吏部左侍郎

掌翰林院事拜南京吏部尚書入為禮部尚書

兼文淵閣大學士加太子太保卒贈少保諡文

隱改諡文毅萬歷初復改諡文肅有龍湖詩集

王元美云張文邦如藥鑄鼎燦爛驚人終之古雅顧玄言云文肅才雄思贍抽緒錯彩爰然

衡岳之秀

詩話吳有洞庭山名也楚有洞庭湖名也郭景純賦云爰有包山洞庭巴陵地道潛達旁通幽岫窈窕蓋謂君山有石穴通吳之包山故包山亦以洞庭名鄴善長注水經二湖俱以洞庭為目誤也張文肅夜過洞庭詩云曉發吳閭門夕渡廣陵汜日暮江帆遲洞庭三百里微風澹無

波明月照天水隱隱見君山鐘聲翠微裏是吳地也而混於楚矣善長北人未折南條諸水文肅家茶陵與洞庭湖密邇豈得以君山屬吳邪

雜興

望湖亭下水如天曾是宣皇賜幸年
玉輦不來鳬鴈冷
一湖楊柳鎖春烟

登石鍾山望廬山

廬岳亭亭翠萬重懸泉千尺挂飛龍
石鍾山下江如鏡
映出青天五老峰

送鍾時亭之南雍

霜落燕山萬木稀
君行歲晚欲何依
十年空獻君王策
猶向橋門著布衣

李默二首

默字時言甌寧人正德辛巳進士改庶吉士累
官太子少保吏部尚書兼學士贈太子太保諡
肅愍有羣玉樓豪

秋夜泊下邳值雨

濁河元楚塞古驛自秦城旅泊河山異飄零風雨生波
濤喧獨枕鐘鼓暗深更秋事方蕭索應知歲晏情

月下

鐘鼎非吾事神仙亦世稀停杯忽惆悵明月上人衣

黃佐

十一首

佐字才伯香山人正德辛巳進士改庶吉士授
編修出為江西按察僉事調廣西召入為左司
諫歷侍讀諭德國子祭酒少詹事兼翰林學士

卒贈禮部右侍郎諡文裕有泰泉集

屠文升云才伯詩會

詮條貫近體雄深麗逸旨遠格精樂府古詩兼總古今出規入矩張崇象云才伯博極羣書

而能反約於心其詩穎出流俗質鉅而力雄

陳師孔云泰泉摘詞酌雅取材於西京割正於

李唐研精於南宋其言奧以文其思婉而微粹

然一出於正王元美云黃才伯如紫瑛石大

似棘韜晚年不無可恨顧玄言云詹事性尚

沖和韻含芳潤譬之龍躍懸河鳳鳴阿閣輝映

高絕信足接武曲江陳

卧子云才伯亦窺見格律

詩話文裕撰體頗正而取材太陳故格雖聳高

而氣少奔逸然嶺表自南園五先生後風雅中

墜文裕力為起衰如黎維敬梁公實輩皆其弟

子嘉靖中南園後五先生二子與焉蓋嶺南詩

派文裕實為領
袖功不可泯也

學古贈胡承之歸闕中

翩翩雙鳴鴈，噉噉雲中飛。
娟娟蛾眉女，札札流黃機。
棄置不成匹，歎息減容輝。
問女何所歎，良人悵有違。
萬里遙相望，何由接音徽。
蕙樓墜素月，蘭燈暖虛幃。
身非驂與服，安得同車歸。
河清尚可俟，會合何可希。
臨歧奏此曲，淚下誰能揮。

碧梧丹鳳圖為黎侍御一卿題

鳳兮鳳兮爾來當何時知爾之德萬古長不衰不然上
天縱爾九苞羽安用珥璫為君不見桃蟲當日飛為鵬
脊令原上啼鵲鴉幾幾音嘒嘒室家恐為陰雨漂偃
禾風定杲日出岡上碧梧寒不凋爾於此時來和鳴叶
簫韶成王優游君奭喜卷阿為爾歌且謠鳳兮鳳兮披
圖對爾起三歎久矣不夢周公旦咸陽宮前多枳棘何
用屑屑悲秦漢

南征詞 三首

鳳野傳清蹕龍旌逼絳霄風雷隨鼓角日月耀金貂躍
馬宜春苑呼鷹織錦橋何如穆天子空賦白雲謠

翠網張瑤浦黃旗漾碧流殷勤供廟薦瀟灑事宸遊御
氣通鮫室祥烟化蜃樓魚龍應自喜何敢負王舟

柳映金陵暮花搖玉帳春江淮明礮火閭闔動梁塵祕
戲徵西域迷樓構北辰三千歌舞伎誰似掌中人

雨

膚寸雲初起彌天雨正狂魚龍空窟宅草木各輝光爽

氣連南紀愁陰接上方故山青未了歸夢此宵長

對月

江月初成鏡山城獨倚樓徘徊如伴客浩蕩更隨舟陌
上清光滿樽前爛熳遊豈知離別後對爾轉添愁

彌羅閣秋望與馬子仲房

羽觀臨霄漢颺臺出薜蘿霞觴延客久琪樹受涼多日
色隱平楚秋聲連大河君看愜幽意吾醉即狂歌

春夜大醉言志

拔劒起舞臨高臺北斗插地銀河迴長空贈我以明月
天下知心惟酒杯門前馬躍簫鼓動柵上雞啼天地開
倦游却憶少年事笑擁如花歌落梅

王元美云此公作
美官講學恐人得

而持之
故也

宮怨

上陽宮殿倚雲霞天外時聞度翠華
魚鑰重重鎖窗戶
夜來春雨到梨花

采蓮曲

隔花相見兩徘徊
蕩漿低頭笑不來
雙棲白鷺忽驚起
遙見浮萍一道開

王用賓

一首

用賓字元興咸寧人正德辛巳進士累官南京
禮部尚書有三渠集

出塞

賀蘭山下羽書飛
廣武營中戰馬肥
壯士爭誇神臂弩
打圍先射白狼歸

何棟 二首

棟字伯直長安人正德辛巳進士選授河南道
御史調宜興知縣陞順天通判轉工部郎中歷
右通政太僕寺卿以左僉都御史撫大同左遷
四川叅議用薦起右副都御史提督薊州加兵
部右侍郎轉左侍郎進右都御史有太華集

玉泉

鬼斧何年鑿仙源此日看濺珠翻石溜拂鏡漾晴瀾鸚

鷓鴣春塘淨雲霞夕影寒分流入內苑故作九龍盤

登真覺寺浮圖

凌空垂寶塔披霧出銅盤影照青蓮色光寒白露團霞
標窺日近風洞洩雲寒靜坐觀空界天花遶石壇

廖道南一首

道南字鳴吾蒲圻人正德辛巳進士改庶吉士
授編修歷侍講學士謫為徽州通判尋復職有

玄素子集

王元美云廖鳴吾如新決
渠浮楚濁泥一瞬皆下

詩話鳴吾詩望之若精選體然
其質鈍轄句束字易於滯澀

靜海遇張汝楨夜話

日夕繫蘭橈山城圍海縣嵐光互明滅水霧遞隱見涼
月鑒廣原靈飈振芳甸幽人抱遐心踟躕夜將半仰觀
河漢流俯察昆蟲變側聞哀鴻音攜手淚如霰

童承敘一首

承敘字士疇一字漢臣沔陽人正德辛巳進士
改庶吉士授編修進侍講歷中允司經局洗馬

國子司業左春坊左庶子有內方集

詩話庶子與張文邦廖鳴吾號楚中三才永陵
以從龍侍臣遇之詩篇比廖差優論者擬之夏
雲秋水不可方
物失其倫矣

臨清雜興

健兒新殺雲中將
曠騎長驅塞北塵
遂使龍顏憂朔漠
遠分虎旅出咸秦
推誠詎識皇心厚
不戰應知廟略神
萬里風烟勞極目
安危須倚近邊臣

倫以諒一首

以諒字彥周南海人正德辛巳進士改庶吉士
歷官南京通政司右叅議有石溪集

詩話嶺表科名之盛莫若南海倫氏自諭德文
敘曾試殿試俱第一其子祭酒以訓會試第一
殿試第二通叅以諒鄉試第一與郎中以詵皆
二甲進士出身然諸公文詠皆各有集傳者特
少其後人亦無繼起者昔王筠論家門謂崔氏
雕龍不過父子兩三世非有七葉之中人人有
集如吾門者以是知古人所重者著述科名
不足較也白山以訓自號穗石以詵自號

舟中夜坐寄弟白山穗石

秦淮烟月蔣山雲回首金陵隔紫氛別浦停橈渾不寐

孤城吹笛詎堪聞
春來花看同鄉樹
嶺外鴻歸逐舊羣
何事人生獨惆悵
百年歧路幾回分

張袞

三首

袞字補之江陰人正德辛巳進士選庶吉士授
監察御史復改翰林編修歷侍讀諭德進侍讀
學士遷太常寺卿掌國子祭酒事左遷南太常
少卿終南光祿寺卿有水南集

奉和順之陽溪別業之作

千峰羅杖底選勝武夷旁夜雨蘼蕪徑春風薜荔牆鑿渠分海色種竹隱嵐光會發王猷興籃輿就辟疆

陪衍聖公祭先師廟

鸞鳳趨蹌地笙鏞迭奏時千春王者祀百世聖人師禮器羣賢別宮牆數仞宜上公詩禮在釋奠有新儀

寄樊僉憲一賢

同是三湘放逐臣歸來猶自厭風塵長沙日落秋陰滿愁殺當時痛哭人

王同祖 一首

同祖字繩武崑山人正德辛巳進士授翰林編
修進司經局正字遷國子司業有五龍山人集

王元美云繩武詩往往
朗秀玄著在容爾雅

涿鹿遇杜道士

晚渡桑乾水西風匹馬過寒城歸鳥急古道夕陽多
迢迢班荆地蕭條伐木歌息息更南北回首意如何

周祚 三首

祚字天保紹興山陰人正德辛巳進士除來安

知縣擢給事中有定齋集

孫仲可云詩以拔去陳故為尚天保樂府

婉而厚古詩醇而鉅近體

脫略纖冶非自空同出邪

詩話給事同懷兄弟四人皆取甲第而能不戀

熱官遠師北地游心風雅即其不以門望驕人

可以停澆激薄矣集四卷

玄孫工部郎襄緒刊行之

雜詩

二儀愆恒運日月斯晦蝕陰陽靡協和風雨失其職天道垂常象君子重刑式百揆理四時允為天子翼一物

苟失所憂懷動顏色邈哉古聖賢旁招暨幽側重華闢
四門尼父取三益周公致太平吐哺不終食

吳偉畫冊為成中丞題

國朝畫師能悉數筆力孰過江夏吳眼前富貴王侯無
故能瀟灑超其徒或時酒酣赤兩足亦或脫帽空頭顱
五岳四瀆生斯須一峰忽從天際拔九派真見江流趨
中丞何由得真蹟列方布冊看有餘清秋示我閭山下
白日宛坐仙人區由來神物易飛去九苞之鳳不在笈

昨聞九月雷電作滄海恐失珊瑚株

后峰

落日滄江返照來江光倒射碧山隈
山人愛聽楓林響月滿柴門未肯迴

張逵

一首

逵字懋登餘姚人正德辛巳進士改庶吉士授
刑科給事中坐劾郭勛李福達謫戍遼陽卒贈
光祿少卿有義樂集

新年

鎡甕三杯酒方牀一覺眠
天涯萬里客如此過新年

謝 蕢 一首

蕢字維盛閩縣人正德辛巳進士除禮科給事中
以議大禮廷杖又劾張桂儉邪不可用奪俸
尋命出知太平府未上官卒于道隆慶初贈太
常少卿有給諫集

白沙月下感懷

野曠霜空萬木凋，歲寒孤櫂傍清宵。
江聲永夜驚虛枕，月色中天上遠潮。
千里風烟勞夢想，十年心跡媿漁樵。
白沙翠竹情無奈，玉宇瓊樓望轉遙。

馬駁一首

駁字抑之上蔡人，正德辛巳進士，除兵部職方主事，改監察御史，有著臺集。

詩話著臺有意法，
古持章句未道。

阻雪張橋驛懷徐道長

人生如浮萍同生水一涯聚者忽焉散合并安可期豈
不憶王孫芳草迷路岐客持雙鯉至云是美人貽與我
期何所乃在淮水湄忽忽玄雲浮雨雪一何滋駕言思
往從徑滑馬行遲相隔匪遠道無緣接高辭始願既已
違延竚益淒其

楊言一首

言字惟仁鄞人正德辛巳進士除行人擢禮科
給事中以言事廷鞫謫判宿州久之遷吏部郎

再謫知夷陵州三遷至湖廣叅議落職有集

李果

堂云先生詩

婉秀明麗

行舟次朱雲巖

迢迢山障月寂寂鴈汀秋
百丈牽三老千峰送一舟
窮猿相叫嘯祭獮互沉浮
不是巫山路空餘楚客愁

任淳一首

淳字元朴堂邑人正德辛巳進士官監察御史

野渡

潦深望不極問渡莫悽然
漁笛薰葭裏因風到客船

邵經邦 一首

經邦字仲德仁和人正德辛巳進士除工部主
事改刑部署員外郎建言廷杖發鎮海衛充軍

有弘藝錄

詩話永嘉以議禮駁貴繼為陸子餘所劾業勒
歸矣尋即召還會陽月日蝕先生上言議禮貴
當用人貴公陛下私議禮之臣是不以所議者
為公禮也夫禮惟當乃可萬世不易使所議非
公則禮可守也亦可變也可成也亦可毀也陸
下果以禮為至當欲子孫世守莫若厚其賚予

全其終始以答議禮之功然後轉選碩德置諸左右使萬年之後廟號世宗不亦美乎永陵震怒既予杖復下獄發邊衛充軍明之列辟永陵猜忌之尤李襄愍以漢武帝唐憲宗發策猶難免於瘐死矧以人生主生前臣下輒敢預為擬諡乎沈孝廉景倩疑世宗二字默契宸衷遂從末減亦未必然予謂先生幸言之於嘉靖初年爾使在西內營齋之日則斷不能保首領矣先生詩少敦琢第七子盛行之日不沿其流派正見鯁骨處

四十明朝是

四十明朝是頻聞畫鼓撾殘燈持自照忽吐兩三花

教英

四首

英字子發清江人正德辛巳進士除南刑部主

事出為陝西提學副使改河南終河南右布政

使有心遠堂豪

熊閭泉云方伯詩興幽思
遠盡絕蹊徑足稱名家

塞上曲

二首

軍中頻宴樂醉後擁雕鞍紫塞連天遠黃雲拂地寒
羌兒叱撥馬胡女固姑冠逐隊營門立春風倚笑看

無定河邊水寒聲走白沙受降城上月暮色隱悲笳
玉帳旄頭落金微鴈陣斜幾時征戰息壯士盡還家

別業漫興

門對寒江舊不斜
旋開三徑學陶家
秋來不問登高節
日日攜壺醉菊花

輞川謁王右丞祠

蜀棧青驪不可攀
孤臣無計出秦關
華清風雨蕭蕭夜
愁殺江南庾子山

黃潤一首

潤字以誠晉江人
正德辛巳進士官至叅政

孟秋

玉衡指孟秋階前鳴促織
光陰良易邁坐覺老來迫
四十道未聞眷言心孔盡
空死讀書螢徒取譏有識迷塗
幸未遐周道矢馬直千里雖云遙終當勵餘力

田頊一首

頊字太素龍溪人正德辛巳進士歷禮兵二部
郎中湖廣僉事貴州提學副使有柘山集

即事

聞道迷陽寇東屯信不虛風雲隨戰伐天地日丘墟列
峒分旗鼓行營接羽書哀哀荷父子生計本樵漁

吳檄
二首

檄字用宣桐城人正德辛巳進士除襄陽推官
入官戶部主事歷武選郎中出為湖廣叅議轉
山東雲南副使終陝西叅政有皖山集

詩話王道思官司封郎為當國者所不悅謫判
毘陵嘉靖乙未三月之望朝士出餞於海淀者
八人唐順之應德陳東約之張元孝少室李遂
邦良李開先伯華熊過叔仁呂高山甫其一則

用宣也海淀在阜成門外其地為張昌國園林
昌國罹禍之後亭臺悉圯諸公置酒為之不樂
惟用宣詩先成所云絃管不隨流水奏綺羅應
化暮雲飛者是也夏桂洲聞之遂劾元孝遂二
司官無事漫游竟下獄七人者相次罷謫惟用
宣幸免爾何元朗述顧東橋赴嚴分宜飲升堂
竟上座酒行嫌冷不堪既易酒至又嫌太熱指
顧揮霍不知有主人而分宜執禮愈恭因謂使
桂洲當此則東橋不免有雙江之禍矣蓋嚴夏
皆媚嫉而當時之論若似乎夏之傾陷有甚於
嚴者觀伯華海淀詩序則桂洲西
市之禍朝士未始不有快意者矣

春日

黃鳥鳴高樹春聲滿鳳城憐子長作客聞此倍含情何

處步芳草出門逢友生東風隨杖屨迢遞晚山晴
甲午冬過荏平間吳叔羽癸巳五月卒哭之

南歸曾得蜀中書道爾平安守故廬荏縣忽聞摧折久
草堂翻恨往來疎家貧妻子應難給歲晚朋儔日已虛
都下送君成永訣忍看詞賦哭相如

張羽一首

羽字子儀崑山人正德辛巳進士刑部郎中有

集

雜言

蜀嚴好沉冥日食止百錢卜筮人所輕久之操彌堅君子有所貴乃不在當年百世有知音何必鍾期然子雲太區區譽之公卿間卑哉益州牧乃欲吏高賢豈無王侯貴敢言不敢言斯道誠兩得永為後世傳

陳大濩

二首

大濩字則殷長樂人正德辛巳進士思恩府同知有雙溪集

十五夜舟中對月

水國人初靜江村月漸高九天開霽色百里見秋毫興
已懷鱸膾官猶滯馬曹孤舟對清夜湖海思滔滔

朱仙鎮岳武穆祠

駐馬朱仙鎮傷心武穆祠誰憐宋社稷竟失漢旌旗星
墮天應憤師班帝豈知空餘祠外柏蕭索向南枝

浦瑾一首

瑾字文玉無錫人正德辛巳進士麗水知縣有

桂巖集

詩話文王晚而通籍牽絲作宰之官三日而病
三月而徂故邵國賢深惜之詩如池萍漲雨青
浮岸鄰樹分陰綠過牆林迴微風生木末江空
落日上簾鉤日斜天外初微雨雲薄樓西忽斷
虹頗與國賢同調

閒居漫興

萬里橋東一草堂
烏皮隱几竹方牀
池萍漲雨青浮岸
鄰樹分陰綠過牆
乳燕出時炊麥熟
繭蛾飛後曝絲香
不知何處炎蒸在
日日清風灑葛裳

張含六首

含字愈光永昌衛人正德丁卯中雲南鄉試有

禺山詩選

揚用修云愈光未壯能詩及長博極羣書條入業貫上獵漢魏下汲李杜

弗工弗庸弗似弗止然工於求古昧於適俗寄贈窮困節義之交萬言不竭於通達周旋之友

片言即窮

任少海云愈光詩險怪詰屈不必

皆中繩墨

王元美云張愈光如拙匠琢山骨

斧鑿宛然

又如束銅銅腹滿中外遺穆敬甫

云張君藻麗

精深殊有襟度顧玄言云愈光

如蘭津天矯

騰逸浮空若鴻鴈不傳天外字芙

蓉空照水中

花銅柱蕙葭鴻鴈響鐵城烟雨鷗

鵠啼此例數

篇非雕飾曼語梁元禮云禺山

詩如峽中女

子野花山梁翠匊銀釵非不飾姿

弄髻拭粉游紅

奈時作蠻語

詩話禹山雖北學於獻吉然詩不盡出其流派
而一以用修為歸觀其熒積字句乏自運之神
方之用修
遠不逮也

戾蟲謠

嗟哉猛虎橫行道阻我欲射虎誰藉我弩我欲殺虎誰
假我斧悠悠蒼天寧獨予苦

峽中

夔州城下陰霏霏我寄客船他夜歸越舲蜀艇幾烏榜

赤甲白鹽雙翠微烟蘿一帶野猿嘯石壁萬仞明星稀
三巴迢遞望三楚京洛紅塵愁滿衣

己亥秋月寄升菴

金馬秋風十載餘芙蓉深巷閉門居登樓莫作依劉賦
奉使曾傳諭蜀書卧病可憐天一柱獨醒無奈楚三閭
北來消息風塵斷白首滄江學釣魚

覽升菴舊時辭翰兼紆別懷

蕭條別館君為客寂寞荒村我閉關鸚鵡洲邊空作賦

鳳皇池上幾時還，羈身萬里棲填海。
歸夢三更過蜀山，此地斷金俱白髮。
往游傾蓋正紅顏。

寄升菴

公子思歸幾歲華，王孫芳草徧天涯。
樓頭豔曲包明月，海口新鉛蔡少霞。

自注升菴近撰海口碑文極奇

光祿塞遙空，遞鴈上。

林枝好，只棲鴉。夢中記得相尋處，東寺鐘殘北寺斜。

顧惟

賢云集中絕唱

春暮

春暮南溪花氣香
亂蜂驚蝶不成行
漁竿在手不須放
釣得鯉魚三尺長

鄧

黻二首

黻字文度其先松江華亭人徙常熟中正德丁卯舉人

詩話文度歌鹿鳴後喪母遂不上公車以通經博古為務嘗與客論文其大略云文章粹於經聖賢以其精蘊而形諸辭辭可以已聖賢必無事於作作焉者不得已也三代而下放臣棄婦之辭讀之尤足以興感者性情也今之為文者無古人之性情與其所遇之時事辭與意背以

諛為容以聚為約浮濫而無法則可以無作或
言西京之文近乎古不知壞古人之文者揚子
諸人有責焉書出陸子餘歸熙甫皆是之當嘉
靖中伯安道思應德既往于鱗元美明卿伯玉
本寧之派盛行詩古文交失其真文度之論
其力挽元氣者與詩亦崛奇不沿七子之習

致道觀七星檜

琳宮何宮堯爽氣凌青蒼中有古檜樹傳植自蕭梁歲
遠四樹存如斗酌天漿東株久已朽慶歷補其亡中株
麗瓊壇少日嬉其旁今已翦不遺取斧斯其香兩株在
東南偃蓋覆修廊攢枝細而密葉聚如鍼芒兩株在西

南赤立膚無霜偃蹇捐殿角督力示堅彊北株最怪異
不與羣木行質幹盡屈鐵天矯互低昂四檜皆左紐枝
柯鬱相望霽晴亦慘黯昏黑常晶光蜀廟青銅柏涿郡
羽葆桑圖經儼封殖况我桑梓鄉石田昔塗寫遺墨好
事藏聊復陳我歌我歌亦堂堂

雷殿畫壁

致道古仙都山水夙清美雷宮設像畫種種盡其技淳
古出適逸意態得深旨左壁挾風雲沙礫卷空起有神

操火具張目怒獰視當其燄所及妖窟泣神鬼右壁已
淋落雲氣來纚纚似聞轟雷車不遑掩其耳南壁雲參
覃電光閃復止有神被甲冑驅偉顙舊紫執爿見真宰
如以職備使北壁方晦冥相去不辨咫尺有神手天瓢九
龍運其水勢欲翻河波雷伯鼓未已靈祠木清肅長夏
頽無沁入門見粉墨鮮不生戰慙乃知藝事能凝神始
臻理吳生貌地獄施帛日雲委惟以神妙故見者雜悲
喜茲事已千年遺跡久零圯茲壁雖尚完能保後無毀

誰為補圖人三歎遜前軌

汪本一首

本字以正歛人正德丁卯舉人有西巖集

王仲房云

以正童穉即解為詩弱冠挺興遂傳高唱潛思取境不落常情天不愛才壯即夭折惜哉詩話十岳山人王寅輯新都秀運集以本詩壓卷稱其愁邊草木歇夢裏關山多之句蓋是時新都風氣咸以篁墩為宗本獨以古為師故亟取之

旅邸述懷

歲月秋將晚風塵鬢欲華孤雲天外影寒菊夢中花濁

酒賒難得滄洲興
未涯何當返初服
歸駕鹿門車

吳益夫

二首

益夫字惟裕
閩縣人
正德丁卯舉人
武學教授
有古迂集

晚歸

夕陽下西林
草徑含暝色
鳴蜩在深樹
向晚猶不息
歸騎且遲遲
中天雲未黑

喜晴

朝日麗郊原晴風動梧竹沙鷗不避人飛來傍船浴

于震
一首

震字孔安餘姚人正德丁卯舉人知福安縣

罪言

北來軍壘幾時平官府無人解治兵豈謂干戈是凶器
本來樽俎屬書生麟符玉冊權空貴鐵馬金戈勢轉橫
歎息廟堂天地隔白頭無路請長纓

管浦
三首

浦

浙士登科
錄作溥

字弘濟餘姚人正德丁卯舉人官

萊州府通判

送顧宗朝還孟城

龍江木落風亂鳴
龍江水邊舟欲行
玉鉶酒盡不成醉
青衫淚濕難為情
借問舟行向何處
美人別我淮南去
海天渺渺孤鶴飛
回首江東隔雲樹
高堂一笑壽且康
弄雛載戲斑斕裳
湖水梅花鬪清絕
尋詩載酒還徜徉
我欲東歸歸未得
風雨茅堂轉相憶
故國迢迢千里餘

雙鯉憑將寄消息

繆天自
云平穩

舟中雜興

江水白於練江花紅欲然長風一萬里吹送木蘭船

田家

豆花香暖木棉開禾黍高低秀作堆落日松風一樽酒
石壕無吏夜深來

吳天祐

一首

天祐字吉甫豐城人正德丁卯舉人官知縣

和荅同年徐豐厓

勞生會晤豈易得別十五年方一來故人幾人道相合
今夕何夕樽同開感君情深愈於舊使我樂極翻成哀
天空月明耿長夜梧葉蕭蕭飛露臺

周青士云坳體頗放漸近自然不知

者以為牽率然非解人不能也

顧彥夫

四首

彥夫字承美無錫人正德庚午舉人官河間府

通判有瀛海集

老年謠

婚嫁紛紛事俱了齒豁頭童容色槁縱是扶筇門外行
亦防頓足風中倒白晝纔興更欲眠黃昏未飯先愁飽
著眼看花眼已花臨書戒草書皆草從容一笑淚反多
急遽數言心似擣此翁耄矣真可憐東抹西塗亦曾好
此身還可作典刑世事何須累懷抱君不見古來豪傑
多軒昂功業將成不能老

南村題柳君宗鎬卷

崇文門外四三里茅屋數間村落裏犬吠花邊驚客來
鳥投樹底知風起主翁散步幽情多點簡留畚早晚禾
歸來一飽有餘樂勢利炎炎如我何隔牆喚過鄰家叟
野菜隨時斟白酒酒後齊聲唱竹枝不覺檐前挂星斗

和詠梅

官閣梅花冷亦開主家故暖賞春杯憑誰寄與人千里
許我來看日幾回竹外一枝風灑落琴中三弄思徘徊
如何不入靈均賦自古山林有逸材

淮陰祠

淮陰城下弔王孫
心事昭昭不待論
一飯尚能酬漂母
後來何忍負君恩

張 紵 二首

紵字世文高郵人
中正德癸酉鄉試
除武昌通

判遷知光州有南湖集

顧英玉云南湖詩操筆立就而尤工於長短句

率意口占皆合格調
朱子价云世文入楚後
詩旨趣沉著超西崑之畛域闖少陵之堂室
詩話南湖學詞曲於王西樓以此擅場詩其餘事如設菖蒲之菹縱有嗜者要非逸味

秋雨

秋雨中宵滴寒蛩四壁吟燈前搔短髮誰會此時心

湖上

欲理木蘭舟且檣垂楊樹沙觜兩鴛鴦飛入前湖去

王希旦

一首

希旦字維周侯官人正德癸酉舉人官禮部郎

中有石溪集

僧院訪蔡可泉荅莊石山來韻

我欲重來此君能幾日留居然人外境已似故鄉秋別
院幽芳雜諸天色界浮都無簪組意猶自問歸不

袁

達

四首

達字德修閩縣人正德癸酉舉人貴溪知縣坐
事下詔獄既釋補湖廣都司經歷有佩蘭集

幽懷

四首

沖懷悅魚鳥放跡棲丘樊永息諠中想方知靜者尊農
人談稼穡穉子牧雞豚時有會心侶晤言孤樹根

獨行清澗濱覽物懷悽惻蘭生何芬芳草掩無顏色漆
割乃自為木伐先其直林深不可留哲人慎日昃

美人天一方游子日千里相期青雲端乃滯滄江溪折
梅寄遠心結草酬知己野外號歸鴻淚下不能止

五月鷓鴣鳴衆草怨芳菲堅冰翕而至碩果存其微醴
酒嘉早決機肉迷先幾冥冥河上公流沙去不歸

桂華一首

華字子朴安仁人正德癸酉舉人有古山先生

集

丙子重過石上

五載今重至人間地亦幽坐深松月夜吟苦竹橋秋問
宅憐曾舍尋山憶昔游主人無限意翻恐僕夫愁

董穀一首

穀字碩甫海鹽人正德丙子舉人授安義知縣
改漢陽有碧里雜存

宿靈壁連城鋪題

日暝鴉歸野色昏解鞍投榻向荒村欲聞清磬何由得

明月滿庭空閉門

自注縣出磬石

方邦望 一首

邦望字表民閩縣人正德己卯舉人惠州推官

有平洲集

詩話表民與郭澄卿皆喜為詩林文恪謂郭學杜而短於才方學孟而學不足以充之鄉曲之言不阿所好可使掌邦國之志矣

春日別洪子

枝上曉鶯飛江亭春未稀輕舟移浦潑別酒惜芳菲風
急寒潮響天長遠岫微此時頻徙倚空憶謝玄暉

張鉉一首

鉉字叔治鄞人正德己卯舉人有鳳山橐

讀史

汾河簫鼓集樓船萬里巡游瀚海邊但慕蓬山連弱水
豈知烽火達甘泉侍臣只奏凌雲賦詞客虛傳出塞篇
日暮五陵原上草古今回首一潸然

陶成一首

成字懋學實應人正德間舉人

寄朱存仁

別來心事不堪聞
細雨孤燈獨念君
短髮漸看添亂雪
此身寧得化歸雲
東風楊柳題歌扇
夜雨琵琶醉舞裙
幾度江干空買櫂
未知何日到淮濱

詩話雲湖寫人物山水最工予嘗從喬侍讀子
靜處見之歎為絕品凌谿其女婿也計偕入都
雲湖語之曰聞張家灣某氏丁香花盛開子盍
隨我觀乎凌谿云去禮部試僅三日公無往雲

湖不許明旦凌谿他避雲湖乘便輿徑去醉主
人家五日傍發凌谿中式比雲湖還鄉人醵錢
賀凌谿雲湖於席上畫丁香一本尤妙
絕洵曠達之士也存仁即凌谿之友

明詩綜卷四十二